

Program Food Bank Malaysia

Pasar tani derma lebihan makanan

Putrajaya: Lembaga Pemasaran Pertanian Persekutuan (FAMA) diumumkan sebagai agensi pertama kerajaan menyokong program Food Bank Malaysia (PFBM) dengan menjadikan pasar tani sebagai penyumbang lebihan makanan.

Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail, berkata PFBM @Pasar Tani itu akan dimulakan di pasar tani terpilih dengan Selangor dan Wilayah Persekutuan menjadi projek perintis sebelum diperluaskan ke seluruh negara.

Beliau berkata, antara kategori produk jualan yang disumbangkan adalah sayur-sayuran, buah-buahan dan barangan runcit.

"Kita sasaran anggaran sumbangan lebihan makanan antara lima hingga 10 peratus bagi satu pasar tani.

"Peniaga tahu corak perniagaan mereka, jadi boleh beri sumbangan pada awal ataupun akhir jualan," katanya selepas pelancaran program Food Bank Malaysia @Pasar Tani di sini, semalam.

PFBM diperkenalkan sebagai satu inisiatif Kementerian Perdagangan Dalam Negeri dan Hal Ehwal Pengguna (KPDNHEP)



Saifuddin bersama Pengerusi FAMA, Ishak Ismail menunjukkan barangan keperluan yang akan diagihkan kepada penerima pada majlis pelancaran Program Food Bank Malaysia @Pasar Tani di Putrajaya, semalam.

[Foto Mohd Fadli Hamzah/BH]

membantu golongan kurang berkemampuan mendapatkan bantuan bekalan makanan daripada lebihan makanan.

Konsep program ini adalah menyelamatkan lebihan makanan yang masih boleh dimakan melalui pengumpulan daripada penyumbang iaitu pasar raya, pengilang, pengusaha makanan, hotel dan syarikat korporat.

Saifuddin berkata, 500 kilogram

sumbangan makanan dikumpulkan semalam daripada Pasar Tani Kekal Selayang dan My Farm Outlet Putrajaya dan akan diagihkan kepada dua rakan strategik utama Food Bank Malaysia, iaitu Food Aid Foundation dan Kehara Soup Kitchen.

"Makanan yang dikumpulkan akan diagihkan kepada kumpulan sasaran yang sudah dikenal pasti daripada keluarga miskin dan

kurang upaya, rumah kebajikan, pusat bantuan makanan, pertubuhan bukan kerajaan dan pelajar universiti yang kurang berkemampuan," katanya.

Pengumpulan sumbangan makanan ini akan diteruskan ke Pasar Tani Setiawangsa, Taman Melawati dan Kelana Jaya pada 27 Julai dan Pasar Tani Shah Alam dan Bukit Angkasa, pada 28 Julai ini.